

# Levindeccunga manda'cho

## Levítico

Moisés ti'tsse Chiga manda'choma Na'sune pañamba Israel dutssi'ye Levímbe dutssiyendeccuma attufaen Na'su Chigama afasundeccuve. Tise'pa ma'caen tsoña'choma pañamba tevaen Levindeccunga manda'cho tevaen'jenga.

### Injansembe'yi egae tsincomba afe'cho

**4** <sup>1</sup>Na'su Chiga Moisésnga qqen su:

<sup>2</sup>“Israendeccuma condaja cuintsu majan a'i injansembe'yi Na'su manda'cho'suma egae tsincon'da qqen tsoñe:

<sup>3</sup>“Chigama afa'su na'su egae tsincon'da tsu poi'yi'cco israendeccune'qqe shacaen. Tsa'caen egae tsincon'da tsu vaura quitsaye chu'a, egave me'choama, Na'su Chiganga afeya'cho tise egae tsincon'choma ccuchaye. <sup>4</sup>Nane tsa vaura quitsaye chu'ama tsu Chigai'ccu cachuicco'je'tti'su sombo'ttinga iya'cho Chiganga afeye. Ipa tsu tisu tivema vaura tsovenga pporaemba tsama fi'ttipa Na'su Chiganga afeya'cho tise can'jen'ttinga. <sup>5</sup>Fi'ttipa re'riccoe vaura anjampama isupa Chigai'ccu cachuicco'je'tti'su carpanga angapa catsey'a'cho cuartonga ca'niña'cho. <sup>6</sup>Ca'nimba tisu tsimian'ccoma tssipoemba enttinge'su cuarto sarupa piccofin'dinga catsepa siete se tsanga bitssaeña'cho Na'su Chiga can'jen'chonga. <sup>7</sup>Toya'caen re'ricco anjampai'ccu tsu Na'su Chiga can'jen'cho pporotsse jincho ñome'bama oque oraen'jen'cho'su ontsian'ccoma onjoaña'cho. Onjoemba tsu toya anjampa anttey'e'choma Chigai'ccu cachuicco'je'tti'su carpa sombo'ttinga angapa andenga zaiña catiya'cho Chigama iñajañe oque oraen'jen'cho jin'ttinga.

<sup>8</sup>“Omboe tsu pa'cco tsa egae tsincon'chone afe'cho vaura ttopani jincho yayapa, dos sevacho, <sup>9</sup>sevachoni jincho yayapama'qqe isuya'cho. Toya'caen sepacconi jincho yayapa, sansani jincho yayapama'qqe sevachoi'ccu isuya'cho. <sup>10</sup>Tsa'caen isupa tsu Chigama afa'suja pa'ccoma oque oraen'jen'chonga oqueya'cho. <sup>11</sup>Tsa'ma vaura ttono, pa'cco na, toya'caen tsove, ttena'go, ttopa, cco'pama'qqe <sup>12</sup>a'i can'jen'cho joccani chunia angaya'cho. Nane pa'cco vaurama tsu tsa'caen joccani angaya'cho cusepama boña'jeni. Tsa cusepa boñanga tsu si'tsima boñamba tsanga vaurama oqueya'cho.”

Poi israendeccu, tise'pa na'su, tsambi'ta majan israe'su a'i, egae tsincon'da tsu vaura quitsaye, chivo, tsambi'ta oveja du'shuma Chigama cachuiccol'je'ttinga ipa afeya'cho.

### In'jan'ma egae tsincomba afe'cho

**6** <sup>1</sup>Na'su Chiga Moisésnga qquen su:  
<sup>2-5</sup>“Majan tise faenga'suma afopoemba dañomba Na'su Chiganga egae tsincon'da tsu tisu egae tsincon'choma tansiaña'cho. Nane majan tise faenga'sunga egama chavaen'da, afe'choma ñotsse coirambipa qqueña'da, aquia a'tutsse cca'na'da, iyicca'yepa itsa'ta, qque'choma atte'ma a'tien'da, tansintse su'cho qquen afopoen'da tsu tisu tsa'caen egae tsincon'choma tansiaña'cho. Tisu tsa'caen egae tsincon'chone tsu shacapa. Tsa'camba tsu Chiganga oque oraemba afe'choma afeya'cho. Toya'caen tsequi a'ta tsu tisu cca'na'choma ccanange'sunga pa'ccoma afepa toya'caen tsa cca'na'cho bare'choma pan'shantsse faesu cincoyi'cho'coe afeya'cho. <sup>6</sup>Na'su Chiganga afeya'cho tsu oveja quitsaye, egave me'choama. Bare'choma que agattosi tsu ccana'suja tise oveja'su tsa'caen bare'cho oveja quitsayema tisu egae tsincon'chone ipa Chigama afa'sunga afeya'cho. <sup>7</sup>Tsa'caen tsonsi tsu Chigama afa'su Na'su Chigama iñajaña tsa a'i ma'caen egae tsincomba shacaen'choma cuintsu ccuchaye. Afe'choma afepa iñajansi tsu Chigaja tsa a'i egae tsincon'choma aqque'paya.”

### Nadab toya'caen Abiú egae tson'cho

**10** <sup>1</sup>Aarón dutssiyendeccu, Nadab toya'caen Abiú, tisia'can Chigama afasundeccupa oque oraen'jen'cho tasama isupa si'ngema ppiñamba ñome'bama'qqe tuiñamba ja'fa Chiganga afeye. Tsa'ma Chiga manda'cho si'ngema ppiñambi'pa ccaninga si'ngema tasanga ppiñamba oque oraemba Na'su Chiganga afe'fa. <sup>2</sup>Tsa'caen afe'fasi tsu Na'su Chiga can'jen'cho'ye si'ngeja sombopa tise'pama oque fi'tti sefaen. Nane Na'su tsa'caen tsonsi tsu pa'fa.

<sup>3</sup>Omboe Aarón iyicca'yese Moisésja tisema qquen su:

—Tsane tsu Na'su Chigaja qquen su:

‘Majan ñanga catsesi gi  
tisenga ña ñotssiamama canjaña.

Nane poi israendecunga gi  
tisu oshacho ñotssiamama canjaña.’

Tsa'caen susi Aarónjan ziya.

<sup>4</sup>Omboe Moisésja Aarón ton'ton Uziel dutssiyendeccu, Misael toya'caen Elzafánma, ttu'sepa qquen su:

—Jipa que'i antiandeccu'yema Chiganga catsel'je'cho cuarto'ye somboen'faja. Somboemba tise'pa ai'voma aindecu can'jen'tti'ye joqquitssian'faja.

<sup>5</sup>Pañamba jipa pa'chondeccumbe ai'vo toya ondiccu'jepama aindecu can'jen'tti'ye joqquitssian'fa Moisés mandaquua'caen.

### Chigama afasundeccu tson'jeña'cho

<sup>6</sup>Omboe tsu Moisésja Aarónja toya'caen tise dutssiyendeccu, Eleazar, Itamarnga'qqe qqen su:

—Que'i tosema fuchhambe injanga anttejama ni que'i ondiccu'jema chittajama ñombi'ye'choma canjaeñe. Nane tsa'caen tson'ninda isha tsu Chigaja que'ima fi'ttipa poi israendeccuma'qqe iyicca'yeya. Tsa'ma que'i antiandeccu, toya'caen poi israendeccu tsu Nadab'ye, Abiú'ye egae tsonsi Na'su Chiga ju'rutssia si'ngema moemba fi'tti'chone ñombi'yeye osha'fa. <sup>7</sup>Toya'caen que'ija Chigai'ccu cachuicco'je'tti'su carpa sombo'tti'ye sombojama, pasa'ne. Nane que'ija Na'su Chiga in'jan'cho aindeccupa qui Na'sumbe yayapai'ccu onjon'chondeccu.

### Anqqe'su, an'masia añá'cho

**11** <sup>1</sup>Na'su Chigaja Moisés toya'caen Aarónma ttu'sepa qqen su: <sup>2</sup>“Israendeccunga conda'faja poi va ande'su añá'cho'su tsu jo'su va'suyi ñoa'me anqqe'su: <sup>3</sup>majan shoshovima amba dos se tse'tsepa an'jen'cho toya'caen tise tsu'tte'qqe dos tsu'tte tsimian'ccove an'bian'cho.

<sup>4</sup>“Tsa'ma va faesu añá'cho tsu an'masia: nane majanda tise anqqe'suma dos se tse'tsepa an'jen'ma tise'pa tsu'tte tsu ccaninga'o. Faesuta tise tsu'tte dos tsu'tte tsimian'ccove an'bian'ma tise anqqe'suma aqquia fae seyi amba cunde'je.

“Nane cameyoja an'masia tsu. Tise anqqe'suma dos se tse'tsepa an'jen'ma tsu'tte tsu ccaninga'o.

<sup>7</sup>“Cochi'qqe an'masia tsu. Nane tise tsu'tte dos tsu'tte tsimian'ccove an'bian'ma tsu tise anqqe'suma aqquia fae seyi amba cunde'je.

<sup>8</sup>“Tsesu añá'choma an'fajama. Nane tsa añá'choja an'masia'pa tsambe ai'vo pa'cho'qqe pporaen'masia tsu. Ega qqen in'jan'cho añá'cho tsu.

<sup>45</sup>“Ñá gi Na'su, que'ima Egipto'ye somboemba que'i Chigave da'cho. Ñajan tsa'caen ñotssiasi que'l'qqe ñotss'e'yi canse'faya'cho.”

### Asettupa pushesu oti'shi'je'cho

**12** <sup>1</sup>Na'su Chiga Moisésma ttu'sepa qqen su: <sup>2</sup>“Israendeccunga qqen condaja: Pushesu surie dapa tsandie du'shuve isu'ta tsu siete a'tave vasesbe'yi can'jeña'cho. <sup>3</sup>Ocho a'ta pasasi tsu du'shumbe ttonoma chhiyi tevaña'cho. <sup>4</sup>Tsa'ma chan tsu faesu treinta y tres a'tave vasesbe'yi can'jeña'cho. Nane osha'cho Chigane jinchoma pporañe oshambipa ni Chigai'ccu cachuicco'je'ttinga ca'niñe oshambiya tsequi a'ta nepiya'ngae. <sup>5</sup>Tsa'ma pushesu du'shuve isu'ta chan tsu dos avuja'quive vasesbe'yi can'jemba faesu sesenta y seis a'ta egapayi can'jeña'cho.

<sup>6</sup>“Pushesuja tsa'caen tsandie du'shuve, tsambi'ta pushesu du'shuve isu'ta tsu asettupa oti'shiya'cho nepisi oveja du'shuma Chigai'ccu

cachuicco'je'tti'su sombo'ttinga angapa afeya'cho. Nane oveja du'shu fae canqqe'fave an'bian'choma tsu afeya'cho Chiganga oque oraña'chove. Toya'caen tsu ppuppuju'choma, tsambi'ta manambema tise egae tsincon'chone afeya'cho. Nane Chigama afa'sunga afesi <sup>7</sup>tsu tiseja tsama oque oraña pushesu egae tsincon'choma pasaeña'chove afaye. Nane tsa'caen tsonsi tsu pushesuja tise egapama ccushaya.”

Tsa'caen tsu Na'su Chigaja manda tsandie, pushesu du'shuma isupa tsoña'chove. <sup>8</sup>Tsa'ma chan oveja du'shuma chavaye oshambi'ta tsu dos ppuppuju'choma, tsambi'ta dos manambema ipa afeya'cho. Afesi fae'ccoma Chiganga oque oraña'cho, faesumajan egae tsincon'choma pasaeña'chove afaya'cho. Tsa'caen afesi Chigama afa'su isupa Chigama afasi pushesuja giya'tsse ccushaya.

### Na congomba paqqe'sune tsoña'cho

**13** <sup>45</sup>“Majan a'i na congomba paqqe'sunga setsapa ttono dañonge'ta tsu tise ondiccu'jema chittapa tise tosema fuchhambe'yi tise aya'fama sarupai'ccu piccopa qqen fundoya'cho: '¡Giya'tssimbi gi! ¡Giya'tssimbi gi!' <sup>46</sup>Nane tsa'caen na congomba paqqe'sui'ccu paji'ta tsu tsa a'ija giya'tssimbipa Chigambe jinchonga catse'ma'sia. Tsa'caen da'ta tsu canqqe joccani tisuyi can'jeña'cho.”

### Na congomba paqqe'suma ccusha'cho

**14** <sup>1</sup>Na'su Chigaja Moisésnga qqen su: <sup>2</sup>“Qquen tsu na congomba paqqe'sui'ccu pajipa ccusha'choma giyaña'cho: Pajipa ccusha'choma isi tsu <sup>3</sup>Chigama afa'su canqqe joccani japa tisema cachuipa caña'cho. Camba na congomba paqqe'su ñoa'me ccusha'chosi atte'ta <sup>4</sup>tsu mandaya'cho cuintu dos anqqe'su chhiriria cansiama, shaga'tto quini'cco, cu'a sarupa, toya'caen canttini'cco tosema iye tise pajipa ccusha'choma giyañe. <sup>5</sup>Isi apinga cuname ichhoi'cho tsa'ccumbe ombanga fae chhiririama fi'ttiya'cho. <sup>6</sup>Fi'ttipa tsu tsambe anjampa api'su tsa'ccunga sun'du'choi'ccu toya cansian chhiririama, shaga'tto quini'cco, cu'a sarupa, toya'caen canttini'cco tosema'qqe tssipoña'cho. <sup>7</sup>Omboe tsu na congomba pajipa ccusha'choma siete se tsa anjampai'ccu bitssaña'cho. Tsa'caen bitssaemba, 'Tayo qui giya'tsse ccusha' qqen supa tsu cansian chhiririama fetta mañaña'cho.

<sup>8</sup>“Majan tsa'caen giya'tsse ccusha'ta tsu tise sarupama ma'ppamba pa'cco tisu ai'vo'su tosema barberai'ccu fuchhapa tisu ai'voma'qqe onjoña'cho. Tsa'caen tsomba giya'tsse dapa tsu canquenga ca'niñe osha. Tsa'caen ca'ni'an'qqe tsu siete a'tave tsa'onga ca'nimbe'yi tsotefani can'jeña'cho. <sup>9</sup>Nane siete a'ta pasasi barberai'ccu pa'cco tosema ccase fuchhaya'cho. Nane tise tsove'su tose, tsojin'ba, biyo'fa, tosa'vuma'qqe fuchhaya'cho. Pa'tssima tsa'caen fuchhapa tisu ai'voma'qqe onjomba pa'cco tise sarupama'qqe ma'ppaña'cho. Tsa'caen tsomba tsu giya'tssiya.

18“Tsa'caen tsu Chigama afa'suja na congomba pajipa ccusha'chombe egae tsincon'chone iñajaña cuintu Na'su Chiga pasaëne. 19Ombœ tsu Chigama afa'su tsa a'imbe egae tsincon'chone afe'cho ovejama oquepa Chiganga afeya cuintu amundetsiama giya'tssia've tsoñe. Toya'caen tsu Na'sunga oque oraemba afe'cho ovejama'qqe oqueya'cho 20oque oraen'jen'chonga. Fae'ngae tsai'ccu tsu trigoma afe'choma'qqe oqueya'cho. Nane tsa'caen tsu Chigama afa'suja tsoña cuintu Na'su Chiga tsa pajipa ccusha'chombe egae tsincon'choma pasaëne. Tise egae tsincon'choma tsa'caen pasaensi tsu giya'tsse daya.”

### Egae tsincon'choma pasaëña'cho a'ta

**16** 1Aarón dos dutssiyendeccu panshaen Na'su Chiga can'jen'chonga catsepa pa'fasi Na'su Chigaja Moisésnga condasepa 2qqen su: “Que quindya Aarónma condaja injanga Chigai'ccu cachuicco'je'cho cuartonga ca'nisa'ne. Nane tsa enttinge'su sarupai'ccu picco'cho cuarto tsu injanga zutsse ca'ni'masia. Toya'caen tsu Chigai'ccu injancco'fa'cho cafon'su piccofin'dija injanga catse'ma'sia. Nane ñajan tsambe ombanga onfen'bai'ccu attiansi tsu panshaen tsa'caen injanga catse'ta paya'cho. 3Nane Aarónjan Chigai'ccu cachuicco'je'ttinga ca'ninda tsu vaura quitsa'ye chu'a toya'caen oveja quitsa'yema fi'ttipa ca'niña'cho. Vaurama tsu tisu egae tsincon'chone fi'ttipa afeya'cho. Ovejama tsu oque oraëña'chove afeya'cho. 4Ca'niñe tson'jen'da tsu lino sarupama ondiccupa tsambe ombanga Chiganga catse'je'cho lino ondiccujema ondiccupa lino utuqui'fai'ccu utuquiya'cho. Toya'caen rande lino goroma ontsiaña'cho. O'tie tisu ai'voma tsa'ccui'ccu onjomba tsu tsa'caen Chiganga catse'je'cho sarupama ondiccuya'cho.

5“Toya'caen Aarónjan dos chivoma israendeccu egae tsincon'chone afe'chove ipa oveja quitsayema'qqe oque oraëña'chove iya'cho.

11“Tisu egae tsincon'cho toya'caen tise antiandeccu egae tsincon'chone tsu Aarónjan tsa vaura quitsayema ipa afeya'cho. 12Afe nanimba ñome'bama oque oraen'jen'cho tasama isupa tsanga Na'sunga iñajan'jen'cho oque'je'cho'su si'ngema ppiñaña'cho. Toya'caen vuvutssia ño'metssia ñome'bama dos pafuve isuya'cho. Tsama isupa sarupa piccofin'dima pashamba enttinge'su cuartonga ca'niña'cho. 13Ca'nimba tsu Na'su can'jen'chonga ñome'bama si'ngenga tuiñaña'cho. Tuiñasi tsu onfen'baja Chiga a'i'ccu injancco'fa'cho cafon piccofin'dima piccoya. Tsa'caen piccosi Aarónjan paya'bi. 14Toya'caen tsu vaura quitsaye anjampama tsimian'ccoi'ccu Chiga a'i'ccu injancco'fa'cho cafon piccofin'dinga bitssaëña'cho coejechiga sombo'jefa'su utufanga. Nane siete se tsu tsa cafon piccofin'di utufanga bitssaëña'cho. 15Tsomba tse'ttie sombopa chivoma aindeccu egae tsincon'chone fi'ttiya'cho. Fi'ttipa tsambe anjampama'qqe isupa ccase sarupa piccofin'dima pashamba Chigai'ccu cachuicco'je'ttinga ca'niña'cho. Ca'nimba Chigai'ccu injancco'fa'cho cafon ombanga toya'caen utufanga'qqe ccase bitssaëña'cho. Nane vaura quitsaye anjampama bitssaenquia'caëni tsu

chivo anjampama'qqe bitssaeña'cho. <sup>16</sup>Tsa'caen tsu Chigai'ccu cachuicco'je'tti'su cuartoma giyaëña'cho israendeccu Chigama pañambipa iyicca'yepa injanga egae tsincon'chone. Toya'caen tsu Chigai'ccu cachuicco'je'tti'su carpama'qqe tsa'caeni giyaëña'cho. Nane tsa carpaja israendeccu can'jen'cho, toya'caen tise'pa egae tsincon'cho, enttingeni tsu ccutsu.

<sup>17</sup>“Aarón toya Chigai'ccu cachuicco'je'tti'su cuartoni egae tsincon'chone pasaëne afaye can'jen'ninda tsu tise somboya'ngae majañi'qqe Chigai'ccu cachuicco'je'tti'su carpani can'jen'masia. Nane Aarón tsa'caen afasi Chigaja tise egae tsincon'cho, tise antiandeccu, toya'caen poi israendeccu egae tsincon'choma'qqe pasaensi <sup>18</sup>sombopa tsu Na'su Chigama iñajan'jen'cho oque oraen'jen'choma'qqe giyaëña'cho. Nane majan vaura quitsaye anjampa, chivo anjampama'qqe isupa tsai'ccu oque'je'cho'su cuatro ontsian'ccoma onjoeña'cho. <sup>19</sup>Toya'caen tsu tsimian'ccoi'ccu oque'je'chonga siete se anjampai'ccu bitssaeña'cho. Tsa'caen tsonba tsu oque'je'choma israendeccu egae tsincon'cho'ye giyaëña'cho, Chigambeve tsoñe.

<sup>20</sup>“Aarónjan tsa'caen Chigai'ccu cachuicco'je'tti'su cuarto, Chigai'ccu cachuicco'je'tti'su carpa, toya'caen oque oraen'jen'choma giyaemba toya cansian chivoma iye mandaya'cho. <sup>21</sup>Isi tsu tise tivema tsa chivo tsovenga pporaemba osha'cho israendeccu Chigama pañambipa iyicca'yepa egae tsincon'chone chivo ombanga condaya'cho. Tsa'caen chivo tsove ombanga condapa tsu ante cuintsu israendeccu egae tsincon'cho chivonga isequia'caen iseye. Israendeccu egae tsincon'cho tsa'caen isesi tsu fae a'i tsa chivoma a'i menia angapa fetta mañaña'cho. <sup>22</sup>Chivoja tsa'caen a'i menia japa qqeupa pa'cco israendeccu egae tsincon'choma'qqe angapa qqeñaña.

<sup>23</sup>“Tse'i tsu Aarónjan Chigai'ccu cachuicco'je'tti'su carpanga ccase ca'nimba pa'cco tise Chigai'ccu cachuicco'je'tti'su cuartoni ca'ni'cho lino sarupa ondiccujema oshichhapa tse'ttinga ccuiñaña'cho. <sup>24</sup>Toya'caen tse'ttingayi tsu tisu ai'voma tsa'ccui'ccu onjomba tisu faesu ondiccujema ondiccupa somboya'cho. Sombopa tsu tisune oque oraëña'choma oquepa israendeccune oraëña'choma'qqe oque oraëña'cho. Nane tsa'caen oque o'raemba afesi tsu tise egae tsincon'cho toya'caen poi israendeccu egae tsincon'choma'qqe pasaëña.”

<sup>34</sup>Tsangae tsa'caen manda'chosi qui anttembe'yi poi canqqe'fa tsa'caen tson'jeña'cho. Nane fae se fae canqqe'fa tsu tsa'caen Chiganga afeya'cho cuintsu israendeccu egae tsincon'choma joqqitssiañe.

### Carpangayi fi'ttipa afeya'cho

**17** <sup>1</sup>Na'su Chigaja Moisésnga qquen su:

<sup>2</sup>“Aarón, tise dutssiyendeccu, poi'yi'cco israendeccunga'qqe Na'su qquen manda'choma condaja:

<sup>3-4</sup>“Vaura quitsaye, oveja, tsambi'ta chivoma Na'su Chiganga afeye in'jamba Chigai'ccu cachuicco'je'tti'su carpani iya'cho tseniñi fi'ttipa afeye. Tsa'ma majan israe'su a'i imbe'yi, cca'tti, tise carpa jin'tti,

tsambi'ta jocca'tti tsa'caen fi'tti'ta anjampama tssañañe egae tsincon'su tsu. Tsa'caen tson'ninda tisema israendeccu'ye joqqitssiaña'cho.

### Anjampama ansa'ne se'pi'cho

<sup>10</sup>“Ñanda gi chi'ga majan israe'su, toya'caen majan que'i'ccu canjen'su israembi'choa, tsa anjampama an'suma. Nane ma'caen tsomba, amba tsambi'ta cu'i'ninda, gi tisema joqqitssiaña que'i can'jen'cho'ye.

<sup>11</sup>Ñoa'me tsu anjampaja osha'cho canseqque'suma cansian'su. Toya'caen ña'qqe gi tsa anjampama antte cuintu tsai'ccu oque'je'chonga bitssaemba que'i egae tsincon'cho'ye pasaye. Nane anjampa tsu que'i egae tsincon'choma pasaemba que'ima ccushaemba cansian'su.

<sup>12</sup>“Tsa'cansi gi israendeccunga qquen su: Que'i israe'su ni que'i'ccu canjen'su israembindeqquia'qqe anjampama an'masia tsu. <sup>13</sup>Nane majan israe'su, que'i'ccu canjen'su israembindeqquia'qqe tsampini jacamba anque'su aña'cho toya'caen chhajeqqe'suma fi'tti'ta tsu tsambe anjampama andenga catipa andei'ccu oviya'cho. <sup>14</sup>Nane ñoa'me poi cansian jincho'su anjampa tsu tisuma cansian'su.”

*Toya'caen Na'su Chigaja tsain'bio faesu manda'choma'qqe Moisésnga conda cuintu israendeccunga condaye. Tsa manda'cho tsu tise'pa aña'chone, tise'pa ande, toya'caen tise'pa gana'jen'chone condapa, coraga tson'jen'chone, tsandie pushesui'ccu can'jen'cho, toya'caen faesu chigandeccuma ñajan'chone manda.*

### Ñotsse canseye manda'cho

**19** <sup>11</sup>“Cca'najama. Afopoenjama ni tisupaporama afopoemba dañojama. <sup>12</sup>“Chiga paña'jen'ni tansintsse afa'cho tsu' qquen afopoenjama. Nane tsa'caen tson'da qui Na'su que Chigama afaseya. Ña gi Na'su.

<sup>17</sup>“Que injama'choni tisu faenga'suma chi'gajama.

“Tisupapora egae tsinconsi atte'ta tisema tansintsse condaja fuitaya'chove. Tsambi'ta que'qqe qui tisia'caen shacapaya.

<sup>18</sup>“Que faenga'su quema egae tson'ninda ccane'qqe tisema egae tsonjama. Ni tise tsa'caen egae tson'ni'qqe que injama'choni botsse tisema chi'gajama. Tsa'ma tisuma in'janquia'caen que faenga'suma ñotsse in'janjan. Ña gi Na'su.

<sup>31</sup>“Coragama ñajanjama pa'choi'ccu afaye ni cocoya condasi atesu'je'chove tta'tta'fajama atesuya'chove. Nane tsa'caen tson'da qui tisuma dañña. Ña gi Na'su que'i Chiga.”

### ¡Avujatssi'faja, ñotsse pañamba!

**26** <sup>1</sup>“¡Chigambindeqquia ñajan'fajama ni ñña'cho chigandeccuve ñña'fajama! Que'i andeni patuma ccutsian'fajama ‘Vaja chiga’ qquen supa. Toya'caen tevaen'cho patuma

ccutsian'fajama tsanga ccaru'faye. Nane Ña gi Na'su, que'i Chiga. 2Ña manda'cho ño'faya'cho a'taja ño'fa'faja. Ñama cachuicco'je'tti'su carpanga ca'ni'da ñotsse tson'faja. Nane Ña gi Na'su que'i Chiga.

3“Que'i ña su'choma ñotsse pañamba ña manda'choma in'jamba tson'jen'ninda 4gi unjin tuite unjima moeña cuintu que'i ande'su jon'cho ñotsse sho'yosi que'i jombachoccu'su quini'cco'qqe ñotsse nañe. 5Trigo tsu cucho'jeya o'fa tsajama taiya'ngae. Toya'caen o'fa tsaja tsu cucho'jeya trigoma joña'ngae. Panma tte'pputsse amba qui que'i andeni dyombi'tsse cansepa avujatssi'faya. 6Ña que'i andenga tsa'caen tsonsi qui opatsse can'jemba ppimppintsse ana'jen'faya. Nane putsa'su ttesia'can que'i andeni can'jeña'bi ni faesu ande'su sundarondeccu'qqe geraeñe ji'faya'bi. 7Que'ija que'i enemigondeccuma dyoña mañaña. Nane tsendeccuma qui matichi'ccu fittitti'faya. 8Cincoyi'cco que'i'su tsu cien enemigondeccuma dyoña mañaña. Nane cien que'i'su tsu diez milma dyoña mañaña. Matichi'ccu fittitti'fasi tsu que'i enemigondeccuja amppippi'faya. 9Ña que'ima ñotsse in'jansi qui ti'tsse atapa'faya. Nane aqqe'paya'bi gi ña que'l'ccu injancco'choma. 10Fae canqqe'fa'su trigoma toya an'jen'ni faesu canqqe'fa'su injan'tsse cu'chosi qui taipa mani boñaña'chove me'i'onsi tssoruma joqquitssiamba cunama boña'faya.

11“Ñajan que'l'ccu cansepa que'ima catiya'bi gi. 12Poi a'ta gi que'l'ccu jacanqquia'caen can'jeña. Nane ñajan que'i Chigasi que'ija ña aindeccuya qui. 13Ña gi Na'su, que'i Chiga, Egipto'ye que'ima somboen'su. Nane egiptondeccu ti'tsse que'ima semoesa'ne gi que'i candenama u'ccaqquia'caen que'ima ccushaen cuintu que'i ansangembe'yi opatsse canse'faye.

### ¡Injama'tse egae tsinconsundeccu!

14“Que'i ñama pañambipa ña mandaqquia'caen tson'fambiya'da– 15ña su'choma chi'gapa ña manda'choma'qqe barembi qquen su'fa'ninda– ña manda'choma ñotsse pañambipa tsa'caen ña que'l'ccu injancco'choma cati'fa'ninda– 16gi ñajan ccane'qqe que'ima catipa que'inga qquen tsoña: que'ima gi ñoa'me dyoñaña osha'cho paqqe'suma moemba. Nane aje, fettupa, toya'caen ai'vo cuñosie daqqe'suma gi moeña. Que'i enemigondeccu que'ima patsupa que'i tai'choma an'fayasi tsu jongoesuma joñe barembi. 17Nane ña'qqe que'l'ccu iyiccosi tsu que'i enemigondeccuja que'ima patsufaya. Que'ima chi'gasundeccu tsu que'ima manda'faya. Faesu que'ima mandiambi'ma qui aqquia buttocan'faya.

18“Ña tsa'caen tsonsi toya ñama ñotsse paña'fambian'da gi siete se ti'tsse que'ima vanaeña que'i egae tsincon'chone. 19Que'i ñotssi'fa qquen in'jan'choma gi dañomba que'ima ansangiaña. Nane sefaccoma gi se'piya unjin tuisa'ne. Andema'qqe gi se'piya jongoesu sho'yosa'ne. 20Aqqiatsse qui vanamba semal'jen'faya. Nane jongoesuve sho'yoya'bi ande'ye ni jongoesuve naña'bi que'i jombachoccu'su quini'cco'ye.”